

2020 Rhif WG20-18

**DEDDF Y GWASANAETH
IECHYD GWLADOL (CYMRU)
2006**

Cyfarwyddydau Gwasanaethau
Meddygol Sylfaenol (Darparu
Gwasanaethau Meddygol
Cyffredinol Hanfodol dros
Benwythnos y Pasg a Gwyliau
Banc yn ystod y Pandemig
COVID-19) (Gwasanaeth
Ychwanegol o dan Gyfarwyddyd)
2020

Gwnaed

07 Ebrill 2020

Yn dod i rym

08 Ebrill 2020

Mae Gweinidogion Cymru, drwy arfer y pwerau a roddir gan adrannau 12(3), 45 a 203(9) a (10) o Ddeddf y Gwasanaeth Iechyd Gwladol (Cymru) 2006(1), ac ar ôl ymgynghori yn unol ag adran 45(4) o'r Ddeddf honno â'r cyrff yr ymddangosai iddynt hwy eu bod yn cynrychioli'r personau y mae'r Cyfarwyddydau hyn yn ymwneud â'u tâl, yn rhoi'r Cyfarwyddydau a ganlyn.

Enwi, cychwyn a chymhwyso

1.—(1) Enw'r Cyfarwyddydau hyn yw Cyfarwyddydau Gwasanaethau Meddygol Sylfaenol (Darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19) (Gwasanaeth Ychwanegol o dan Gyfarwyddyd) 2020.

(2) Daw'r Cyfarwyddydau hyn i rym ar 08 Ebrill 2020 a deuant i ben ar 1 Hydref 2020.

(3) Mae'r Cyfarwyddydau hyn wedi eu rhoi i Fyrddau Iechyd Lleol.

Dehongli

2. Yn y Cyfarwyddydau hyn—

ystyr “blwyddyn ariannol” (*“financial year”*) yw'r cyfnod o 1 Ebrill i 31 Mawrth mewn unrhyw flwyddyn;

ystyr “Bwrdd Iechyd Lleol” (*“Local Health Board”*) yw Bwrdd Iechyd Lleol sydd wedi ei sefydlu yn unol ag adran 11(2) o Ddeddf 2006;

mae i “claf cofrestredig” yr ystyr a roddir i “registered patient” yn rheoliad 2(1) o Reoliadau'r Gwasanaeth Iechyd Gwladol (Contractau Gwasanaethau Meddygol Cyffredinol) (Cymru) 2004;

ystyr “contract gwasanaethau meddygol cyffredinol” (*“general medical services contract”*) yw contract ar gyfer gwasanaethau meddygol cyffredinol rhwng contractwr GMC a Bwrdd Iechyd Lleol a wneir yn unol ag adran 42 o'r Ddeddf;

ystyr “contractwr GMC” (*“GMS contractor”*) yw person y mae Bwrdd Iechyd Lleol yn ymrwymo neu wedi ymrwymo i gontract gwasanaethau meddygol cyffredinol ag ef;

ystyr “contractwr GMC sydd wedi ei gymryd ymlaen” (*“engaged GMS contractor”*) yw contractwr GMC sy'n cytuno â Bwrdd Iechyd Lleol i ddarparu'r Gwasanaeth Ychwanegol hwn o dan Gyfarwyddyd yn unol â chytundeb a wneir yn unol â pharagraff 4(1);

ystyr “Datganiad ar Hawlogaethau Ariannol” (*“Statement of Financial Entitlements”*) yw unrhyw gyfarwyddydau a roddir gan Weinidogion Cymru yn unol ag adran 45 o'r Ddeddf mewn perthynas â thaliadau sydd i'w gwneud gan Fwrdd Iechyd Lleol i gontractwr GMC;

ystyr “Deddf 2006” (*“the 2006 Act”*) yw Deddf y Gwasanaeth Iechyd Gwladol (Cymru) 2006;

ystyr “y Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19” (*“Specification for the Easter Weekend and Bank Holiday provision of Essential General Medical Services during the COVID-19 Pandemic”*) yw'r Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19 yn Atodlen 1 i'r Cyfarwyddydau hyn;

ystyr “gwasanaethau meddygol cyffredinol hanfodol” (*“essential general medical services”*)

yw'r gwasanaethau y mae rhaid eu darparu o dan gontract gwasanaethau meddygol cyffredinol yn unol â rheoliad 15 o Reoliadau'r Gwasanaeth Iechyd Gwladol (Contractau Gwasanaethau Meddygol Cyffredinol) (Cymru) 2004⁽¹⁾;

ystyr "Gŵyl Banc" ("*Bank Holiday*") yw diwrnod a bennir ym mharagraff 15 o'r Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19 yn Atodlen 1;

ystyr "penwythnos y Pasg" ("*Easter weekend*") yw diwrnod a bennir ym mharagraff 13 neu 14 o'r Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19 yn Atodlen 1;

ystyr "proffesiynolyn gofal iechyd" ("*health care professional*") yw person sy'n aelod o broffesiwn a reoleiddir gan gorff a grybwyllir yn adran 25(3) o Ddeddf Diwygio'r Gwasanaeth Iechyd Gwladol a Phroffesiynau Gofal Iechyd 2002⁽²⁾.

Sefydlu Cynllun i ddiogelu bod Gwasanaethau Meddygol Cyffredinol Hanfodol yn cael eu darparu dros Benwythnos y Pasg a Gwyliau Banc yn ystod y Pandemig COVID-19

3.—(1) Mae'n ofynnol i bob Bwrdd Iechyd Lleol o dan adran 41 o Ddeddf 2006 (gwasanaethau meddygol sylfaenol) arfer ei swyddogaethau er mwyn darparu gwasanaethau meddygol sylfaenol yn ei ardal, neu ddiogelu bod gwasanaethau meddygol sylfaenol yn cael eu darparu yn ei ardal.

(2) Fel rhan o'i waith o gyflawni ei swyddogaethau o dan adran 41 o Ddeddf 2006, rhaid i bob Bwrdd Iechyd Lleol sefydlu (os nad yw eisoes wedi gwneud hynny), gweithredu ac, fel y bo'n briodol, ddiwygio cynllun i ddiogelu bod Gwasanaethau Meddygol Cyffredinol Hanfodol yn cael eu darparu dros benwythnos y Pasg a Gwyliau Banc yn ystod y pandemig COVID-19.

(3) Diben sylfaenol y cynllun i ddiogelu bod Gwasanaethau Meddygol Cyffredinol Hanfodol yn cael eu darparu dros benwythnos y Pasg a Gwyliau Banc yn ystod y Pandemig COVID-19 yw—

- (a) sicrhau bod gwasanaethau meddygol cyffredinol hanfodol yn cael eu darparu ar gyfer cleifion sy'n gofyn am ymgynghoriad yn ystod oriau penodedig penwythnos y Pasg a Gŵyl Banc, a

(1) O.S. 2004/478 (Cy. 48).

(2) 2002 p. 17.

- (b) lliniaru'r galw anochel ar adrannau brys a gwasanaethau ymarferwyr cyffredinol y Tu Allan i Orlau ar adeg pan fydd ysbytai yn gweithredu hyd eithaf eu capasiti yn ymdrin â'r pandemig COVID-19.

Cynllun i ddiogelu bod Gwasanaethau Meddygol Cyffredinol Hanfodol yn cael eu darparu dros benwythnos y Pasg a Gwyliau Banc yn ystod y Pandemig COVID-19

4.—(1) Fel rhan o'i Gynllun i ddiogelu bod Gwasanaethau Meddygol Cyffredinol Hanfodol yn cael eu darparu dros benwythnos y Pasg a Gwyliau Banc yn ystod y Pandemig COVID-19, rhaid i bob Bwrdd Iechyd Lleol gynnig ymrwymo i drefniadau ar gyfer darparu gwasanaethau yn unol â'r Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19 â phob contractwr GMC, mewn perthynas â chleifion cofrestredig y contractwr GMC hwnnw.

(2) Pan na fydd cleifion contractwr GMC yn cael y gwasanaethau a amlinellir yn y Gwasanaeth Ychwanegol hwn o dan Gyfarwyddyd gan y contractwr GMC y maent yn gleifion cofrestredig mewn perthynas ag ef, caiff y Bwrdd Iechyd Lleol wneud trefniadau i sicrhau bod triniaeth yn cael ei darparu i gleifion cofrestredig y contractwr GMC hwnnw mor agos i fangre practis y contractwr GMC hwnnw ag sy'n rhesymol ymarferol, a chaiff y Bwrdd Iechyd Lleol gyflenwi'r gwasanaethau o dan y Gwasanaeth Ychwanegol hwn o dan Gyfarwyddyd i'r cleifion hynny mewn unrhyw ffordd y mae'n credu ei bod yn briodol (gan gynnwys, ond heb fod yn gyfyngedig i, drwy ddarparu'r gwasanaethau ei hunan neu drefnu i unrhyw contractwr GMC sydd wedi ei gymryd ymlaen gyflenwi'r gwasanaethau hynny).

(3) Rhaid i bob contractwr GMC sydd wedi ei gymryd ymlaen gwblhau, erbyn unrhyw ddyddiad sy'n ofynnol gan y Bwrdd Iechyd Lleol, bla sy'n nodi'r trefniant ar gyfer cyflenwi'r Gwasanaeth Ychwanegol hwn o dan Gyfarwyddyd i gleifion y contractwr GMC sydd wedi ei gymryd ymlaen.

(4) Pan fo trefniadau yn cael eu gwneud rhwng y Bwrdd Iechyd Lleol a chontractwr GMC yn unol â pharagraff (1), rhaid i'r trefniadau hynny, mewn cysylltiad â phob blwyddyn ariannol (neu ran o flwyddyn) y maent yn ymwneud â hi, gynnwys—

(a) gofyniad bod y contractwr GMC—

- (i) yn darllen ac yn ystyried y Cyfarwyddydau hyn wrth gydymffurfio â'r Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig

COVID-19 sydd, gyda'i gilydd, yn darparu'r gofynion manwl ar gyfer y Gwasanaeth Ychwanegol hwn o dan Gyfarwyddyd;

- (ii) yn darparu'r gwasanaethau a amlinellir yn y Fanyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19 ac yn unol â'r plan a bennir ym mharagraff (3) uchod;
 - (iii) yn darparu data, yn ddarostyngedig i is-baragraff (iv), i'w Fwrdd Iechyd Lleol a Llywodraeth Cymru, pan fydd yn ofynnol, i roi gwybod am y diwrnodau a'r amseroedd y bydd y contractwr GMC yn cynnig y Gwasanaeth Ychwanegol hwn o dan Gyfarwyddyd;
 - (iv) yn sicrhau codio cyson ar gyfer cipio data a chydymffurfio â deddfwriaeth berthnasol ynghylch llywodraethu gwybodaeth;
 - (v) yn sicrhau bod gan bob proffesiynolyn gofal iechyd sy'n ymgymryd â'r Gwasanaeth Ychwanegol hwn o dan Gyfarwyddyd y sgiliau, yr hyfforddiant, y cymhwysedd a'r profiad angenrheidiol er mwyn darparu'r gwasanaethau;
 - (vi) yn sicrhau bod pob proffesiynolyn gofal iechyd sy'n ymgymryd â'r Gwasanaeth Ychwanegol hwn o dan Gyfarwyddyd wedi ei indemnio neu ei yswirio'n ddigonol am unrhyw atebolrwydd sy'n codi o'r gwaith sy'n cael ei wneud;
 - (vii) yn cyflenwi i'w Fwrdd Iechyd Lleol unrhyw wybodaeth y mae'r Bwrdd Iechyd Lleol yn gofyn yn rhesymol amdani at ddibenion monitro sut y mae'r contractwr GMC sydd wedi ei gymryd ymlaen yn cyflawni ei rwymedigaethau o dan y Gwasanaeth Ychwanegol hwn o dan Gyfarwyddyd, mewn perthynas â'r plan a bennir ym mharagraff (3), a
- (b) trefniadau talu am gontractwr GMC sydd wedi ei gymryd ymlaen, y mae rhaid iddynt ddarparu iddo allu hawlio—
- (i) taliad o £275 y dydd am bob 1000 o gleifion ar ei restr cleifion am bob diwrnod llawn y mae'r contractwr GMC yn darparu'r Gwasanaeth Ychwanegol hwn o dan Gyfarwyddyd;
 - (ii) taliad o £150 y dydd am bob 1000 o gleifion ar ei restr cleifion am bob hanner diwrnod y mae'r contractwr GMC yn

darparu'r Gwasanaeth Ychwanegol hwn
o dan Gyfarwyddyd;

ac ar ôl i'r taliadau fod yn ddyledus, fel
uchod, a chael eu hawdurdodi gan y Bwrdd
Iechyd Lleol, bydd y taliadau hynny yn cael
eu talu wedyn ar y dyddiad y bydd taliad
misol Swm Craidd y contractwr GMC yn dod
yn ddyledus nesaf yn unol â'r Datganiad ar
Hawlogaethau Ariannol.

(5) Rhaid i'r Bwrdd Iechyd Lleol, pan fo'n
angenrheidiol, amrywio contract gwasanaethau
meddygol cyffredinol y contractwr GMC fel bod y
trefniadau a wneir yn unol â pharagraff (1) yn rhan o
gontract y contractwr GMC a bod gofynion y
trefniadau yn amodau o'r contract.

(6) Ymdrinnir ag unrhyw anghydfodau sy'n codi o
ganlyniad i ddarparu'r Gwasanaeth Ychwanegol hwn o
dan Gyfarwyddyd yn unol â Rhan 7 o Atodlen 6 i
Reoliadau'r Gwasanaeth Iechyd Gwladol (Contractau
Gwasanaethau Meddygol Cyffredinol) (Cymru)
2004(1).

(7) Pan fo'r Bwrdd Iechyd Lleol yn cyflenwi'r
Gwasanaeth Ychwanegol hwn o dan Gyfarwyddyd yn
unol â threfniant yn unol â pharagraff 4(2), rhaid i'r
Bwrdd Iechyd Lleol sicrhau bod paragraffau 4(4) a
4(5) yn gymwys i unrhyw drefniadau fel y byddent i
gontractwr GMC sydd wedi ei gymryd ymlaen.



Llofnodwyd gan Alex Slade, Dirprwy Gyfarwyddwr,
yr Is-adran Gofal Sylfaenol o dan awdurdod y
Gweinidog Iechyd a Gwasanaethau Cymdeithasol, un
o Weinidogion Cymru

Dyddiad: 07 Ebrill 2020

ATODLEN 1

Manyleb ar gyfer darparu Gwasanaethau Meddygol Cyffredinol Hanfodol dros Benwythnos y Pasg a Gwyliau Banc yn ystod y Pandemig COVID-19

Cyflwyniad

1. Mae'r fanyleb hon yn nodi gofynion y Gwasanaeth Ychwanegol o dan Gyfarwyddyd ar gyfer darparu Gwasanaethau Meddygol Cyffredinol (GMC) hanfodol dros benwythnos y Pasg a Gwyliau Banc yn ystod y pandemig COVID-19.

2. Rhaid i Fyrddau Iechyd drwy Gyfarwyddyd gynnig y cyfle i bractisau gymryd rhan yn y Gwasanaeth Ychwanegol hwn ar Ddydd Gwener y Groglith a Gŵyl Banc Dydd Llun y Pasg. Yn ychwanegol, caiff Byrddau Iechyd gynnig y cyfle i bractisau gymryd rhan yn y Gwasanaeth Ychwanegol hwn ar y dydd Sadwrn neu'r dydd Sul ar benwythnos y Pasg ac ar y Gwyliau Banc ar ddyddiau Llun ym mis Mai ac ym mis Awst.

3. Yn ystod y pandemig COVID-19, pan fydd y boblogaeth yn gweithredu yn unol â chynghor o ran cyfyngiadau symud, neu yn unol â deddfwriaeth frys, i aros gartref, gan gynnwys cau ysgolion, efallai y bydd mwy o alw ar gontractwyr GMC tra bo llai o gapasiti hefyd wrth ddarparu GMC hanfodol, yn y gwasanaethau o fewn ac y tu allan i oriau.

4. Diben y Gwasanaeth Ychwanegol hwn yw ymdrin â darparu GMC hanfodol i gleifion sy'n gofyn am ymgynghoriad yn ystod oriau penodol ar benwythnos y Pasg ac ar Wyl Banc. Bydd hyn yn lliniaru'r galw anochel ar adrannau brys a gwasanaethau ymarferwyr cyffredinol y Tu Allan i Orlau ar adeg pan fydd ysbytai yn gweithredu hyd eithaf eu capasiti wrth iddynt ymdrin â'r pandemig COVID-19.

5. Mae'r Gwasanaeth Ychwanegol hwn yn galluogi contractwyr GMC i ddarparu GMC hanfodol ar adegau ac ar ddiwrnodau y tu allan i oriau craidd eu contract GMC.

Cymhwysra

6. Bydd pob contractwr GMC sy'n cymryd rhan yn y Gwasanaeth Ychwanegol hwn ac sy'n bodloni'r gofynion a nodir yn y Fanyleb hon yn gymwys i gael taliad.

7. Bydd unrhyw glaf sy'n gymwys i gael GMC hanfodol, gan gynnwys preswylwyr dros dro, yn gallu

cael gafael ar gontractwr GMC pan fydd y Gwasanaeth Ychwanegol yn cael ei weithredu.

8. Mae'r Gwasanaeth Ychwanegol hwn yn cefnogi contractwyr GMC i ddarparu GMC *hanfodol* ond nid gwasanaethau *ychwanegol*.

9. Rhaid i gontractwyr GMC fabwysïadau model brysbennu cyflawn yn unol â chynghor cyfredol Llywodraeth Cymru ar yr adeg y darperir y Gwasanaeth Ychwanegol hwn, fel nad yw ymgynghoriadau wyneb yn wyneb (mewn meddygfa, yn ystod ymweliad â'r cartref neu mewn lleoliad canolfan clwstwr) ond yn digwydd ar ôl ymgynghoriad dros y ffôn neu drwy fideo neu ar-lein. Bydd hyn yn lleihau'r perygl o fynediad amhriodol i fangreoedd contractwyr GMC gan gleifion sydd wedi eu heintio ac felly yn gwarchod ymarferwyr cyffredinol, eu staff a'u cleifion.

10. Ni chaiff contractwyr GMC gytuno i ddarparu'r Gwasanaeth Ychwanegol hwn ac wedyn, o ganlyniad i hynny, dynnu'n ôl o fentrau clwstwr COVID-19 yr oeddent wedi cytuno'n flaenorol i gymryd rhan ynddynt.

11. Rhaid i gontractwyr GMC sicrhau bod meddygon yn anrhydeddu unrhyw gytundebau neu ymrwymïadau sydd eisoes yn bodoli i'r gwasanaeth ymarferwyr cyffredinol y Tu Allan i Orlau. Ni chaniateir cymryd ymlaen unrhyw feddyg i ddarparu'r Gwasanaeth Ychwanegol hwn os bydd hynny'n niweidio gweithrediad y gwasanaeth ymarferwyr cyffredinol y Tu Allan i Orlau a chapasiti'r gwasanaeth hwnnw.

Cyflenwi

12. Rhaid i'r Gwasanaeth Ychwanegol hwn gael ei ddarparu o safleoedd prif feddygfeydd. Os yw contractwr GMC fel arfer yn darparu gwasanaethau clinigol ymarferydd cyffredinol mewn meddygfeydd cangen 5 niwrnod yr wythnos, caiff y contractwr GMC ddarparu'r Gwasanaeth Ychwanegol hwn o safle meddygfa cangen, ond dim ond os yw safle'r brif feddygfa hefyd yn darparu'r Gwasanaeth Ychwanegol.

13. Rhaid i'r Bwrdd Iechyd Lleol gynnig y cyfle i'r contractwyr GMC ddarparu'r Gwasanaeth Ychwanegol hwn ar gyfer GMC hanfodol yn ystod y cyfnodau agor a ganlyn ar benwythnos Gŵyl Banc y Pasg—

- (a) Dydd Gwener y Groglith, 10 Ebrill 2020 - 8:00 i 18:30 (10.5 awr), a
- (b) Gŵyl Banc Dydd Llun y Pasg, 13 Ebrill 2020 - 8:00 i 18:30 (10.5 awr).

14. Caiff y Bwrdd Iechyd Lleol gynnig y cyfle i gontractwyr GMC ddarparu'r Gwasanaeth

Ychwanegol hwn ar gyfer GMC hanfodol yn ystod y cyfnodau agor a ganlyn ar benwythnos Gŵyl Banc y Pasg—

- (a) Dydd Sadwrn y Pasg, 11 Ebrill 2020 – 8:00 i 13:15 (5.25 awr), a
- (b) Dydd Sul y Pasg, 12 Ebrill 2020 – 8:00 i 13:15 (5.25 awr).

15. Caiff y Bwrdd Iechyd Lleol gynnig y cyfle i gcontractwyr GMC ddarparu'r Gwasanaeth Ychwanegol hwn ar gyfer GMC hanfodol yn ystod y cyfnodau agor a ganlyn ar y Gwyliau Banc a ganlyn—

- (a) Gŵyl Banc Calan Mai, Dydd Gwener 8 Mai 2020 – 8:00 i 18:30 (10.5 awr),
- (b) Gŵyl Banc y Gwanwyn, Dydd Llun 25 Mai 2020 – 8:00 i 18:30 (10.5 awr), ac
- (c) Gŵyl Banc yr Haf, Dydd Llun 31 Awst 2020 – 8:00 i 18:30 (10.5 awr).

16. Rhaid i'r contractwr GMC gymryd galwadau yn uniongyrchol o'i gleifion cofrestredig ac fe'i gwaherddir rhag dargyfeirio galwadau i Alw Iechyd Cymru 111 yn ystod yr oriau y mae'r Gwasanaeth Ychwanegol yn cael ei weithredu.

17. Rhaid i'r contractwr GMC ddefnyddio model brysbennu cyflawn i sgrinio pob cais am ymgynghoriad wyneb yn wyneb.

18. Rhaid i'r contractwr GMC allu cynnig ymgynghoriadau wyneb yn wyneb ym mangre'r brif feddygfa neu'r feddygfa cangen o dan yr amgylchiadau a amlinellir ym mharagraff 12.

19. Pan fo'r contractwr GMC yn defnyddio tîm gofal sylfaenol amlddisgyblaethol, rhaid i lefelau staffio priodol fod yn eu lle i sicrhau y gall ymgynghoriadau wyneb yn wyneb fod gydag unrhyw broffesiynolyn priodol, nid o reidrwydd gydag ymarferydd cyffredinol.

20. Mae'r contractwr GMC yn gyfrifol am sicrhau staffio priodol i ddiwallu anghenion cleifion a rhaid cael o leiaf un ymarferydd cyffredinol yn y fangre drwy'r amser yn ystod yr oriau pan fydd mangre'r feddygfa ar agor ac yn darparu'r Gwasanaeth Ychwanegol hwn, oni bai ei bod yn angenrheidiol i'r holl ymarferwyr cyffredinol yn y fangre ymweld â chartrefi cleifion sydd eisoes wedi eu brysbennu.

21. Caiff y contractwr GMC ddefnyddio tîm amlddisgyblaethol i gefnogi unrhyw ymarferydd cyffredinol yn y fangre. Caiff unrhyw aelod o'r tîm cymorth amlddisgyblaethol weithio o bell a darparu ymgynghoriadau dros y ffôn neu drwy fideo.

22. Ni chaiff y contractwr GMC gymryd ymlaen ymarferwyr cyffredinol locwm i gyflenwi'r Gwasanaeth Ychwanegol hwn yn benodol.

23. Rhaid i'r contractwr GMC sicrhau bod dau aelod o staff y dderbynfa ym mangre'r feddygfa drwy'r amser yn ystod yr oriau pan fydd mangre'r feddygfa ar agor ac yn gweithredu'r Gwasanaeth Ychwanegol hwn.

24. Rhaid i'r contractwr GMC ystyried sut y byddai modd darparu hebryngwr pe bai'n ofynnol cael un mewn ymgynghoriad.

Taliad

25. Bydd contractwr GMC sy'n dewis darparu'r Gwasanaeth Ychwanegol hwn yn gymwys i gael y taliadau a ganlyn—

- (a) £275 y dydd am bob 1000 o gleifion ar ei restr cleifion am bob diwrnod llawn ar y Gwyliau Banc a bennir ym mharagraffau 13 a 15, a
- (b) £150 y dydd am bob 1000 o gleifion ar ei restr cleifion am bob hanner diwrnod ar y dydd Sadwrn a'r dydd Sul a bennir ym mharagraff 14.